

東鹿五志合集

冀州胡永明
題



乾隆束鹿縣志卷之八

人物志

邑介燕趙之間土泉深沃潏沔湧其前燕山環其後氣疏達而奧衍近聞樂毅藺相如廉頗之遺風士大夫多尙氣節崇禮讓甲於河朔惜漢晉間所載信都安國如耿純劉祐孟業諸人未能強定爲邑產自唐張興以忠烈著入明以來靖遠之功勛毅愍之忠節安簡司空之政績唐哉盛矣而名著月旦烈標青史者不乏人焉嗚呼前事之不忘後事之帥也鄉先哲之流風餘韻更千百世下猶有感發而興起者其在斯編乎其在斯編乎

忠烈

余讀史至張公殉難蓋不禁掩卷泣下也唐自安史煽亂二十四郡無義士獨顏常山與公耳公忠烈出於天性非慕倣爲之罵賊數語凜凜與日月爭光而唐室褒卹之典無聞何哉紫陽夫子於綱目大書特書嗚呼足以慰幽魄矣宋有董公明有周公國朝有趙公彪炳金石興感人心固非淺也試登紅艸坡酌酒夕陽高歌憑弔倘亦共驂鸞駟而來翔

乎

唐

張興力舉千鈞性復明辨爲饒陽裨將祿山反攻饒陽興開陳禍福固衆心嬰城以守彌年滄趙陷史思明率賊搏城興環甲持陌刀重五十斤與賊持一舉刀輒數人死賊皆氣懾城破思明縛之馬前謂曰將軍壯士能屈節當受高爵對曰昔嚴顏一巴將猶不降張飛我大郡將安能委身逆胡今日幸得死然願以一言爲誠思明曰云何興曰天子遇祿山如父子今乃反大丈夫不能爲國掃除反爲其下何哉思明曰將軍不觀天道耶吾上起兵二十萬直趨洛陽天下大定以偏師叩函谷守將西縛唐亡固矣興曰桀紂秦隋窮人力舉四海與爲怨故商周漢唐因得代之而有神器皇帝無違德祿山非數帝賢是苟延歲月終即擒耳思明怒鋸解之且死罵曰吾能裒殲死兵敗賊衆軍中凜然爲改容

宋

董元亨累官國子博士判貝州王則據城叛元亨坐廳事賊排闥直入左右皆奔潰脇元

亨索軍需元亨據案厲聲叱之張目罵賊遂被害事聞仁宗曰守法之臣也贈太常少卿明

周國垣河南嵩縣守備流賊破城招降不屈責三十銅棍死

國朝

趙自光官漕運千總同守備寶繼昌屢立戰功順治四年隨征寇閩力戰死之奉旨賜銀兩卹其家

勛爵

勛業之於人難矣哉豪傑之士乘時翌運披艸萊斬荊棘積功百戰剖符分封與國長久尙矣至若承平無事士多以文章政治躋通顯而遭逢小醜弄兵廟堂或勤遠略如麓川之事兵連禍結殺傷過當府庫半虛僅而獲息作史者至今以爲口實而帶礪之盟聲施爛如嗚乎是天焉爲之不可強也而功罪之權衡讀史者亦可以曉然矣舊志僅載王公今增元耿氏三人於首

元

耿福字伯禧沈鷺寡言善騎射有謀略讀書通大義太祖兵入中原攝縣政保庇一方及木華里至縣遂以其衆降以功拜鎮國上將軍安定州節度使行元帥府事佩金虎符後加輔國上將軍以疾卒

耿孝祖襲束鹿縣軍民長以孫貴贈嘉議大夫禮部尚書上輕車都尉高陽郡侯

耿繼元字順臣以質子襲束鹿縣尹官制行遷尹行唐固安錦州判官葛城大同河間三縣尹同知絳州事階忠顯校尉以子貴累贈中奉大夫河南江北等處行中書省叅知政事護軍封高陽郡公

明

王驥字尙德束鹿人長身偉幹便騎射剛毅有膽曉暢戎略中永樂四年進士爲兵科給事中使山西奏免鹽池通課二十餘萬尋遷山西按察司副使洪熙元年入爲順天府尹宣德初擢兵部右侍郎代顧佐署都察院久之署兵部尚書九年命爲真正統元年奏詔

議邊事越五日未奏帝怒執驥與侍郎鄭埜下之獄尋得釋阿台朶兒只伯數寇甘涼邊將屢失利侍郎柴車徐晞都御史曹翼相繼經理邊務未能制二年五月命驥往許便宜行事驥疾驅至軍大會諸將問往時追敵魚兒海子先退敗軍者誰僉曰都指揮安敬驥先承密旨戮敬遂縛敬斬轅門并宣敕責都督蔣貴諸將皆股慄驥乃大閱將士分兵畫地使各自防禦邊境肅然閱軍甘涼汰三之一定更番法兵得休息而轉輸亦省俄阿台復入寇帝以任禮爲平羌將軍蔣貴趙安爲副驥督軍三年春偕諸將出塞以貴爲前鋒而自與任禮帥大軍後繼與貴約曰不捷無相見也貴擊敵石城敵走兀魯乃貴帥輕騎二千五百人出鎮夷間道兼行三日夜及之擒左丞脫羅斬首三百餘獲金銀印各一駝馬兵甲千計驥與禮自梧桐林至亦集乃擒樞密同知僉院十五人萬戶二人降其部落窮進至黑泉而趙安等出昌寧至刁刀溝亦擒右丞達魯花赤三十人分道夾擊轉戰千餘里朶兒只伯遠遁論功貴禮皆封伯而驥兼大理卿支二俸尋召還理部事久之麓川之役起麓川宣慰使思任發叛數敗王師黔國公沐晟討之不利道卒以沐昂代昂條上

攻取策徵兵十二萬人中官王振方用事喜功名以驥可屬思大舉驥亦欲自效六年正月遂拜蔣貴平蠻將軍李安劉聚爲副而驥總督軍務大發東南諸道兵十五萬討之刑部侍郎何文淵侍講劉球先後疏諫不納瀕行賜驥貴金兜牟細鎧蟒繡緋衣朱弓矢驥請得以便宜從事馳傳至雲南部署諸將遣叅將冉保由東路趨孟定大軍由中路至騰衝分道夾擊是年十一月與貴以二萬人趨上江圍其寨五日不下會大風縱火焚柵拔之斬首五萬餘級進自夾象石渡下江通高黎貢山道閏月至騰衝長驅抵杉木籠山賊高據險築七壘相救驥遣叅將宮聚副將劉聚分左右翼緣嶺上而自將中軍奮擊之賊大潰乘勝至馬鞍山踰月抵賊巢山陡絕深塹環之東南面江壁立不可上驥遣前軍覘賊敗其伏兵賊更自間道立柵馬鞍山出大軍後驥戒軍中無動而令都指揮方瑛以六千人突賊寨斬首數百復誘敗其象陣會東路軍冉保等已合木邦車里大侯諸土軍破烏木弄憂邦諸寨遣別將守西峨渡防賊軼刻期與大軍會驥乃督諸將環攻其七門積薪縱火風大作賊焚死無算溺江死者數萬人思任發携二子走孟養獲其虎符金牌宣

慰司印及所掠騰衝諸衛所印章三十有奇犂其巢穴留兵守之而還明年四月遣偏師討維摩土司韋郎羅郎羅走安南俘其妻子傳檄安南縛之以獻五月師還帝遣戶部侍郎王質齋羊酒迎勞賜宴奉天門封推誠宣力武臣特進榮祿大夫上柱國靖遠伯歲祿千二百石世襲指揮同知賜貂蟬冠玉帶貴進侯劉聚等遷賞有差從征少卿李賁郎中侯璉楊寧皆擢侍郎士卒賜予加等府庫爲竭思任發之竄緬甸也其子思機發復帥餘衆居者藍乞入朝謝罪廷議因而撫之王振不可是年八月復命驥總督雲南軍務帥叅將冉保毛福壽以往未至而思機發遣弟招寨入貢緬甸亦奏獲思任發要麓川地朝廷不納其貢且敕驥圖緬甸驥因請濟師八年五月復命將貴爲平蠻將軍調土兵五萬往發卒轉餉五十萬人驥初檄緬甸送思任發緬人陽聽命持兩端是年冬大軍逼緬甸緬人以樓船載思任發覘官軍而潛以他舟載之歸驥知緬人資木邦水利爲唇齒且慮思機發將以獻其父故仇之故終不肯獻思任發驥乃趨者藍破思機發巢得其妻子部落而思機發獨脫去明年召遷加祿三百石命與都御史陳鑑巡延綏寧夏甘肅諸邊初寧

夏備邊軍半歲一更後邊事亟三年乃更軍士日久疲罷又益選軍餘防冬家有五六人在邊者軍用重困驥請歲一更當代者以十月至而代者留至來年正月乃遣歸邊備足而軍不勞帝善其議行之諸邊當是時緬人已以思任發來獻而思機發竊駐孟養地屢遣使入貢謝罪中外咸願罷兵振意終未慊要思機發躬入朝謝沐斌帥師至金沙江招之不至諭孟養執之以獻亦不聽命於是振怒欲盡滅其種類十三年春復命驥總督軍務宮聚爲平蠻將軍帥師十五萬人往明年造舟浮金沙江蠻人柵西岸拒守官軍聯舟爲浮橋以濟拔其柵進破鬼哭山連下十餘寨墜溺死者無算而思機發終脫去不可得是時官軍踰孟養至孟邾海地在金沙江西去麓川千里自古兵力所不至諸蠻見大軍皆震怖而大軍遠涉驥慮餽餉不繼亟謀引還時思機發雖遁匿而思任發少子思陸復擁衆據孟養驥度賊終不可滅乃與思陸約立石表誓金沙江上曰石爛江枯爾乃得渡遂班師驥凡三征麓川卒不得思機發議者咎驥等老師費財以一隅騷動天下而會川衛訓導詹英抗疏劾之大略謂驥等多役民夫昇綵繪散諸土司以邀厚利擅用腐刑詭

言進御實充私役師行無紀十五萬人一日起行互相蹂踐每軍負米六斗跋涉山谷自縊者多抵金沙江徬徨不敢渡既渡不敢攻攻而失都指揮路宣翟亨等俟賊解多捕魚戶爲俘以地分木邦緬甸掩敗爲功此何異李宓之敗而楊國忠以捷聞也奏下法司王振左右之得不問而命英從驥軍自效英知往且獲罪匿不去當是時湖廣貴州諸苗所在蜂起圍平越及諸城堡貴州東路閉驥至武昌詔還軍討苗會英宗北狩羣臣劾王振並及驥以驥方在軍且倚之平苗置弗問命佩平蠻將軍印充總兵官侍郎侯璉總督軍務已而苗益熾衆至十餘萬平越被圍半歲巡按御史黃鎬死守糧盡掘草根食之而驥頓軍辰沅不進景泰元年鎬草疏置竹筒中募人自間道出聞於朝更命保定伯梁瑤爲平蠻將軍益兵二萬人侯璉自雲南督之前疾戰大破賊盡解諸城圍而驥亦俘剗平王蟲富等以獻驥還命總督南京機務其冬乞世券與之南畿軍素偷惰驥至以所馭軍法教之于謙弗重也朝廷以其舊臣寵禮之三年四月賜敕解任奉朝請驥年七十餘躍馬食肉盛聲伎如故久之石亨徐有貞等奉英宗復辟驥與謀賞稍後上章自訟言臣子祥

入南城爲諸將所擠墮地幾死今論功不及疑有蔽之者帝乃官祥指揮僉事而命驥仍兵部尙書理部事加號奉天翊衛推誠宣力守正文臣光祿大夫餘如故數月請老又三年乃卒年八十三贈靖遠侯諡忠毅傳子瑞及孫添添尙嘉善長公主再傳至孫瑾嘉靖初提督三千營協守南京還掌左府久之佩征蠻將軍印鎮兩廣廣東新寧新興思平間多高山叢箐亡命者輒入諸獠中吏不得問衆至萬餘人流劫高要陽江諸縣官軍討之輒失利三十五年春瑾與巡撫都御史談愷檄諸路土兵誅其魁陳以明悉平諸巢捷聞加太子太保而扶藜葵梅諸山峒馮天恩等據險爲寇者亦數十年瑾復督軍分道進剿破巢二百餘復以功廕一子錦衣百戶言官劾其暴橫召還爵傳至明亡乃絕

照明史列傳備載

仕蹟

仕宦旣分載選舉姓字下而復紀仕蹟爲一類何也士君子讀書窮巷砥行立名一旦乘時以赴功名之會大而朝宇小而民社苟能抒經濟舉利弊不負君不負民不負學政碑所頌史冊所書推原里籍與有榮施沒而爲鄉先生祀之於社何其重也至卑論儕俗與

世浮沉以梯榮而橐利如雲烟之過眼里人亦不能舉其姓字吁可不畏哉讀志者合兩者而按之其亦思發憤有爲矣

元

耿煥以國子伴讀貢刑部椽歷司農中書初授戶部主事由員外郎郎中至尙書歷戶禮刑工四部由都事爲郎中在中書左右司由僉憲憲副爲使遷河南山東江西浙江四道監察御史六登中外臺爲執收在江西浙江行省中書都省累二十三遷爲左丞俱有能績穆元字子初初從事翰苑考滿授承事郎胸山縣尹兼管諸軍勸農事轉承直郎冀寧同知

李謙世祖時爲陽穀縣尹才能敏捷敦教化重農桑斷獄明允民有以罪被收者隸殺之誣以自刺謙驗其無血疑之乃取二鷄殺其一流血其一撲殺復刺之無血隸遂伏時有嘉禾一莖數穗民謂德政所致去後立石頌之

明

王太保文者初名強字千之號簡齋先鳳陽府霍邱人也大父璧仕元爲杭州路總管明洪武初左遷保定府清苑簿占藉束鹿因世爲束鹿人文深沉有大略永樂中由鄉薦計偕於京師上命選下第舉人給冠帶入冒監文與焉辛丑登進士擢監察御史有聲宣德中與同官王翱于謙成爲都御史顧佐器重時彰德妖寇張普祥謀逆宣廟命都御史舉風厲御史往治推文同中官劉永成行劉恃寵強悍見文輒斂跡自下初普祥募化於居士大夫之家凡有布施悉以姓名登簿書及敗同事者得簿書坐以通謀欲盡捕之人心洶洶文曰此輩布施時寧知謀逆坐之非朝廷意也取簿書焚之全活者數萬家事平還奏稱旨欽改今名擢陝西按察使正統四年陞都察院右副都御史巡撫寧夏兼理軍務五年入爲大理寺卿七年夏大旱上命中官興安審成獄文片言折之衆皆輸服未幾陞都察院右都御史理院事時吏部尙書郭璉貪墨盤據要津文疏其罪罷斥風紀大振人憚之十年朝廷以陝右重地道都御史鎮守與陳鑑交代不接談一揖而已風采凜冽沿邊肅然十四年英廟北狩當國者移文沿邊歛民入城以避文謂不宜驚擾惑民心關

中安堵如故尋召還加太子太保左都御史掌院事南畿富民固山周家私債殺人御史按之如法周乞大同輸粟三十萬充餉贖罪司錢穀者以倉庫乏請集廷臣會議文至首發大義曰祖宗定律殺人者抵命貪賊者落職奈何貪富民三十萬糧賣祖宗法衆唯唯卒坐法景泰四年南畿山東河南大饑文奉命賑貸便宜行事全活數十餘萬戶越明年改吏部尙書翰林院大學士典機務疏納言舉賢賑民數事稱旨五年蘇松大水民饑貸粟富室不與焚其廬舍蹈海避罪勢同叛逆上命文廉之悉坐以法蘇松以安事竣加少保兼東閣大學士修寰宇通志爲總裁書成加謹身殿大學士毅然有爲上錫白金印章篆其文曰忠誠匪懈眷重特優云先是景泰元年也先遣使請送上皇還京朝議未定有投匿名揭者謂奉迎禮當從厚主上當避位懇辭而後受命禮部尙書胡濙得之大學士高穀因與吏部尙書王直等議封進文曰上皇不還我輩臣子死不贖罪但敵人叵測初故以社稷爲重君爲輕示之蓋緩之實所以急之也安知今日不來嘗我且大勢已定安知內庭無小人煽惑生出他變此中機竅先後緩急差一着不得須慎重爲之給事中葉

盛林聰等草疏同上得旨繳進文與于謙陰爲調停卒主迎復三年見濟生廣西奸人黃
竑建易儲之義祈免死罪命廷臣會議文曰上皇在外我輩立主迎復此後不宜數與主
上忤當從權乃定議立見濟易茂陵爲沂王外庭未諳多有異議會天順丁丑英廟復辟
武清侯石亨誇奪門功又因文在都察院劾其不法有宿恨乃乘機誣王文于謙遣人齎
金牌勅符取襄王世子上怒遂同于謙范廣等俱刑西市時冤之成化己丑文子宗彝伏
闕陳冤上遣官諭祭錄一孫入監讀書特進太保諡毅愍論曰王太保者屢鎮大藩兩總
憲政每廷議百官莫敢先發文以一二語裁決及入閣毅然欲有所爲殆深沉剛果人也
通紀列卿紀中多有異議余常平心論之阻迎復一事文固不容辭觀後取襄王世子與
于少保謙同死莫須有之獄似不能無疑讀瑣綴錄兵部進士楊集爲黃翊進易儲之說
以書上于謙謙示文文曰書生不知朝廷時勢法度然有膽氣當進一級處之遂出知安
州其心事可見上欲易子留侯不能直得之漢高況其下焉者又謂希太監王振意誣薛
文清瑄以死結太監王誠賁緣入閣文性剛果因劾郭璉有聲遂欲深文以督大僚又因

郭璉曾首薦瑄督山東學政疑爲璉之私人未免偏執指爲黨振恐未必然至於入閣一節讀高穀行實曰景泰三年高世用以陳芳洲獨寵任欲援知己爲助疏請增閣員意屬錢原博及疏下內閣推舉芳洲曰疏中有云不拘繁劇衙門則三法司亦可舉若則吾所知者蕭維禎也意實不在蕭特以沮錢耳高遽改舉王文意實不在王特以沮蕭耳文遂有入閣之命蓋當日文荷上眷獨優也斯固際遇使然以爲高穀因文結王誠而薦之無乃已甚乎嗟君子之立身也不可不慎失足小人便爲終身之累然此輩方用事比肩事主又安能盡絕斯固有幸與不幸耳即如康海因救李夢陽詣劉瑾士論短之豈不可惜又神廟時有楊春茂者救吳守禮黃山一案保全徽州百萬戶稱名御史先是計偕入都僦居於魏忠賢舍魏頗重之時魏蓋一無賴淨身男子也及成進士入臺班久與魏絕不意魏寵遇熹廟竟不能忘情于微時僦居之舉子會銓部以應天巡按請楊方給假家食並未列銜即奉內批巡按應天着楊春茂去力辭不得都門喧噪遂濺身魏璫千戴不白若王太保者亦可謂不幸矣

田綱永樂戊子舉人拜禮科給事中儀度端肅立朝侃侃陞湖廣叅政

甄譴永樂戊戌進士選翰林庶吉士授檢討遷兵部主事以事謫甘州判官尋陞壽州知州鳳陽府知府沉靜文雅以正自持不能隨世以就功名

賈道字會稽正德甲戌進士授山東益都知縣陞戶部主事監河西務稅講明道學爲士林矜式居官峻潔卒之日無以爲殮時論高之

賈俊字廷傑景泰庚午舉人性剛介尙氣節天順己卯以國學被簡爲山西道監察御史代巡浙江山西陝西河南南畿凡五出皆有聲擢山西按察司僉事協守寧武諸關整飭軍務邊鄙晏然尋遷副使分司臨清用薦爲右僉都御史巡撫寧夏俊飭憲度嚴軍法邊疆不舉烽火者六年成化癸卯召入爲工部右侍郎飭材訓藝動必信度乙巳河南饑上遣俊賑貸多所全活丁未轉左黜邪崇正仕路澄清吏部尙書三原王恕號知人會工部缺推俊爲尙書俊清慎儉約凜不可犯時工部所隸匠作如作頭攬戶包替賣放私役及僞印假牌弊叢集又有勢要高抬虛估爲物料案俊嚴革之復建議差官點驗內府長工